

廣東歷代詩僧簡介（十五）

慧光居士

今龍

今龍字枯吟，高州茂名人，少年脫白，禮石波禪師，受具。己亥參天老人於雷峯，求入室咨決疑義，下語未契，出為典客，始知老人作用。隨入丹霞，參請益切。會石鑑禪師分座怡山，奉命以監寺輔行。泊石公退院，從福州往參天童，當機大悟，木陳和尚付以大法，日升猊座者再。道風傾於東南，尋示寂天童。公威儀整雅，行解堅卓，頗弄文翰，有語錄詩稿行世。

山居雜詠

吾道久寂寞。愛此林無喧。不聞野干吼。祇見象王尊。鉢洗龍湫怒。藤支鳥道翻。香泉一掬飲。已覺清心魂。月出驚性悅。自忘清影孤。溪風颯然至。掃我林間枯。兀坐草芒伏。振衣雲點無。石梁橫巨壑。不用一枝扶。萬籟此中寂。吾心自杳冥。隱臨流水遠。榻對亂峯青。橡栗供朝爨。瓶盂濯晚汀。岩前拂危石。枯坐自喃經。

送似千大師還雷峯西堂

下山分手即乘船。歸去春雷振法筵。一象自奔員嶠月。雙鷗曾運海螺天。雲垂大海蕪千朵。月落同風印大川。從此野干應避路。堂堂直闢洞宗禪。

九成臺寄懷廣州諸同學

刺桐花落翠華翹。天樂猶傳下九霄。想得芙蓉開水驛。自多龍象渡仙橋。樹中樓閣藏煙雨。鏡裏帆檣阻暮潮。千古揮弦何日再。月明江上聽吹簫。

峨嵋山僧寄筇竹杖同賦

霜根剗得換枯藤。點破峨嵋六月冰。深伴團瓢依曲盞。扶看

瀑布上嶒嶸。煙霞拂拭交湘客，風雨飛來寄嶽僧。宜近石頭聽說法，捧持童子髮鬚鬢。

陳顛菴先生讀枯吟詩絕句：落月垂雲共化沾。東南詩力鬥莊嚴。律音頗有崢嶸氣。迥異尋常蔬筍甜。

今漸 古正 古真

今漸字頓修，浙江湖州府歸安縣人姓茅氏，鹿門先生裔孫。辛卯入雷峯時，年始二十，求見天老人，出世之念益堅，受具後與山品崑公，縛茅雷峯山麓，閉關踰二載，老人以法器期之，畀掌記室，多所指授。頃從入棲賢，刀耕火種，剪除蕪穢，與大眾作苦。以母老歸養苕霅間，種茶自給。後再遊廣州，遇樂說和尚，主法長慶，遂留住會下，未知所終。

冬日同麥一覺黃當蒞許識微松溪探梅

望斷孤山韻不羣。時携好友一尋君。蕭疏未易親顏色。磊落空令靜見聞。許我棲心臨水影。期誰把臂倚巖芬。寒林吾輩真堪託。不久春風捲白雲。

後一日復訪梅於丹水

幽衷既向君投分。不惜清光遠到林。但得芳香同歲盡，何知桃李亂春深。野人欲折畏寒意。高士應憐遲暮心，他日擬歸匡嶽頂。相思空谷足知音。

秋懷

舊知交冷自為歡。禮貌粗疏似懶殘。擬學鶴心含月皎。終成松性傲霜寒。叢篁浥露千尋易。獨鳥迎風寸步難。惟有青山堪作伴。餘生高臥白雲端。

性若空山松桂枝。堅貞那免雪霜摧。幽香暗逐秋雲隱。古意深期野鶴知。誰識殘荷乘露折。自憐弱柳着風吹。未能親證無生忍，百歲精神難久持。

古正字輪潔，茅氏頓修從兄。弱冠爲諸生，文詞瞻美。漸公未出家前，已聞天老人洞風傾注，遂挈其子智攝徒步來皈。甲辰受具，卽典記室，歷居歸宗丹霞雷峯諸山，不改典籤之役。性沉毅，有道念，每遇林谷幽邃之地，獨往危坐，人莫知其所向，終於海幢院中。

寄懷廬山青松院可琢上人

自入庾關斷塞鴻。幽懷長日憶青松。移茅已見湖光近。種樹應添黛色濃。計拙誤投爭戰地。時危眞羨寂寥峯。舊廬尙在青溪下。好倩匡雲爲我封。

族弟雪鴻見訪次韻答之

迢迢家國兩茫然。投老空林數問天。巢破尙餘雙鉢在。詩亡寧借一燈傳。籬栽黃菊何時返。幕入紅蓮恐尙牽。休道賈生無薦剡。吳公今已識名賢。

詠署中并蒂蘭

曾聞蘭省霽餘芳。官舍秋滋葉許長。角髻玉童依石案。駢枝仙掌出巖廊。並肩修好宜聯譜。競體幽香可共行。從此冠裳充雜佩。更饒花國勝河陽。

偶成

十年聚散隙中塵。贏得溪山到眼新。粘殼蝸行空露角。抽絲蠶盡卽藏身。健餐黃葉多餘味。病對青銅寡所親。敢爲吾衰添鬱結。老成零落倍傷神。

古眞字智攝，輪潔正公之子，先後薙髮，在歸宗受具。隨杖入雷峯，充點座，後歷副寺。年少有心，行多著績常住，早負夙慧，時露文采，惜未究祖道而終。

秋日送非四公還匡山

匡廬六載會同席。谷口林泉又遠離。殯母每懷歸土切。從師敢訝入山遲。珠江煙雨帆高掛。廬嶺秋風杖獨支。滿眼黃花難致贈。望雲徒起故人思。

陳顛菴先生讀頓修輪潔智攝詩絕句：迢迢家國兩茫然。苔書書生出世堅。太息詩亡詩教在。一燈猶及繞湖煙。

古卷

古卷字破塵，從化人，族姓鄧，原名璵，邑諸生，弱冠有俊才，不樂進取。聞天然禪師道傾嶺南，日遊訶林門下，竊聽餘論，忽起疑情，勃然有出世之志，父見不能強。己丑從戒壇剃落，衣伽黎衣，隨杖入雷峯。時龍象騰踏，法席最盛，穎鋒無出其右者，天老人甚器之。因求道過苦，寢食俱忘，脅不沾席者年餘，遂以病蛻，與足兩巖公。鐵機沼公稱莫逆友。

王澹子居士新葺野樗亭成招集同賦

未許言高隱。茅亭置水鄉。選苔先覆地，借竹遠臨牆。辯古藏俱出。談空興倍長。因僧汲西澗。竟夕發茶香。

山中早秋

山中暑初退。一雨便成秋。峯影當窗落。泉聲繞榻流。吟興爲菊早。病起送人遊。萬籟此時動。予將何所求。

送曹源公遊西樵卜隱

雲中鷄犬似仙鄰。欲掃何峯可避塵。谷口片霞窺過客。松間微月照幽人。竹香晚食尋燒筍。花落行單羨積茵。想得到時衣履濕。滿山紅雨杜鵑春。

陳顛菴先生讀破塵詩絕句：訶林舊侶緒餘多。毛穎機鋒漫費呵。居士詞壇留一席。野樗亭畔暢吟哦。

古電

古電字非影，新會李氏子，幼隨母出世，依天老人。庚子登具，執侍服勤三十餘年，寒暑靡間，老人住丹霞，行募江右。辛亥住歸宗，復行募吳越。比還雷峯，屬典庫藏，凡事皆肩荷向前，不遺餘力，每一參請，必膝行胡跪，語十許轉，老人深契之。

居棲賢，獨肩常住之務，樂說和尙稱其無愧於行解，相應法苑長城。老人入涅，未蒙記蒞，樂公勸梓其石窗草行世，蓋不欲其陸沈象中，露其一斑云爾。世壽五十五，示寂棲賢。

春日山居

谷口殘雲斷。花間每獨憑。清風來短徑。初日照疏簾。綠樹黃驪過。丹崖白鹿登。山中何所伴。惟此日爲朋。

夏日山居

清涼誰不惜。林下獨携筇。狹徑無驚犬。深潭有臥龍。嶺頭雲寂寂。橋畔水淙淙。閒倚石臺上。微風吹古松。

秋日山居

樹裏南湖白。階前野菊黃。不因看好景。何事下禪牀。望月霄旻淨。澄心身世忘。悠然寒夜永。亭畔落微霜。

冬日山居

雪霽千峯白。寒光照草堂。圍爐燒榾柮。背日補衣裳。境寂心逾澹。情枯道亦忘。柴門終日掩。無事但焚香。

江右舟中偶作

斷岸依殘驛。寥寥一葉偏。生涯憐此日。心緒憶前年。霜落空花散。光浮水月圓。孤懷何所寄。携枕伴鷗眠。

宿準提菴和異峯大師韻

禪室東山下。蓬門一徑幽。風生明月夜。露下碧梧秋。地僻煙光遠。堂虛鶴影投。高僧留翰墨。清和滿齋頭。

遊五老峯訪澤山大師

結宇五峯間。高深盡日閒。湖光晴入戶。雲影冷藏山。偷果猿頻到。銜花鳥不還。幽棲踪跡絕。何幸得追攀。

同塵異大師作金聲見春日登丹霞對現臺

無事共躋攀。春臺坐不還。風驅江瀨湧。苔蝕石紋斑。出岫雲藏寺。臨流花繞山。鐘聲催落日。憑眺更乘閒。

過春浮園

多少名園付劫灰。春浮花木獨長開。門臨碧水煙霞繞。路夾蒼松猿鶴來。石檻迂迴縈古蘚。竹林深淺隱高臺。亂餘相對幽巖壑。翻惜當年鼓樂催。

旋菴老宿新築幽居賦贈

山窗斜傍綠陰開。樹色連煙過水來。日暮獨尋花徑去。潮平時見釣船迴。簷前野果分僧供。砌下秋葵爲客栽。老大幽懷同少壯。夜深還上妙高臺。

遊錢塘西湖

二月錢塘花滿隄。六橋春色接城西。羣鷗避雨投荷葉。細草和煙沒馬蹄。杖笠徘徊朱檻晚。樓臺依舊白雲齊。閒遊卻起滄浪思。應買湖邊何處棲。

陳顥菴先生讀非影詩絕句：歸宗行橐棲賢席。三十年來心力傾。法苑長城清譽好。那知五字亦長城。

古 鍵

古鍵字鐵關，順德胡氏子，庚戌年甫十八，出世雷峯，辛亥始登具。初欲入棲賢依天老人，至海幢爲阿大師留掌記室，尋典賓客。丁丑復居雷峯掩關。有比丘香雲刺指血求書華嚴經，鍵暑月披衣長跪，繕寫精勤，過勞得咯血之病，以此致蛻，尙餘數卷未獲卒業。鍵出於右族，而本生單弱，有祖名受僧，傳鍵而絕，其託生亦有因也。

入連江登曹娥廟

樹暗曹娥廟。維舟亦黯然。沙流昨夜雨。林散欲晴煙。不滅殘苔碣。猶餘照月泉。臨風追往事。名姓在山川。

遊小嶺值雨

萬峯藏一壑。鳥道入寒松。雲隱石如觸。溪迴水自春。探泉攀絕巘。依壁坐蒙茸。卻怪林梢雨。催人覓短筇。

秋夜登浴日亭

露寒亭畔望重重。水帶漁歌岸帶鍾。白浪影浮無際月。碧天斜插數行峯。海門上下分荒蕪。塵世蒼茫付短筇。一嘯日輪看漸起。藉茵誰與待高春。

陳顥菴先生讀鐵關詩絕句：蒼茫塵世海天空。詩意催人覓短筇。獨有華嚴三兩卷。血書心願未曾終。